

03 APR 2001

RRJP3-PERNIAGAAN

DR MAHATHIR MAHU SYARIKAT TEMPATAN TERJALIN DALAM RANTAIAN NILAI GLOBAL

KUALA LUMPUR, 3 April (Bernama) -- Syarikat-syarikat perniagaan Malaysia mesti mengukuhkan rangkaian mereka dengan syarikat multinasional asing untuk mengambil peluang daripada kontrak yang ditawarkan di peringkat dunia dan menjadi sebahagian daripada rantaian nilai global, kata Datuk Seri Dr Mahathir Mohamad.

Perdana Menteri juga berkata perniagaan dan institusi tempatan digalakkan bekerjasama dengan perniagaan asing untuk membentuk kerjasama strategik dalam penyelidikan dan pembangunan (R&D), reka bentuk produk, pembuatan, pengedaran dan pemasaran.

Mereka hendaklah mengeluarkan barangan modal dan barang perantaraan dalam bidang di mana Malaysia mempunyai kelebihan bersaing bukan sahaja untuk melengkap dan menggantikan barangan import tetapi juga eksport, katanya ketika membentangkan Rangka Rancangan Jangka Panjang Ketiga (RRJP3) di Dewan Rakyat di sini, hari ini.

Dr Mahathir berkata dalam RRJP3, pembangunan perusahaan kecil dan sederhana (PKS) akan digalakkan untuk meningkatkan rantaian antara dan dalam industri serta mengukuhkan asas industri.

Bagi meningkatkan sumbangan perusahaan kecil dan sederhana kepada pertumbuhan ekonomi, usaha akan diambil untuk memperbaiki pengurusan kewangan dan kemahiran pemasaran serta mengukuhkan pertalian mereka dengan industri berskala besar manakala satu zon perindustrian khas yang mempunyai perkhidmatan sokongan akan diwujudkan untuk PKS bagi membolehkannya mencapai ekonomi bidangnya.

Dr Mahathir berkata bahawa eksport, terutamanya barangan buatan akan kekal sebagai penyumbang utama kepada pertumbuhan ekonomi negara.

Selain barangan elektrik dan elektronik, eksport keluaran pembuatan berasaskan pertanian dan berasaskan sumber dijangka meningkat selaras dengan perkembangan pemprosesan barangan pertanian tempatan serta pembangunan Malaysia sebagai sebuah "hub" makanan halal antarabangsa.

Beliau berkata barangan modal dan barangan perantaraan akan terus merupakan sebahagian besar import utama negara.

Bagaimanapun, dengan peningkatan keupayaan mengeluarkan sebahagian daripada barangan-barangan ini termasuk penglibatan PKS yang lebih besar, import dijangka berkembang pada kadar yang lebih rendah, katanya.

Menjelang 2010, per kapita Keluaran Negara Kasar (KNK) dijangka mencecah RM23,610 pada nilai semasa dalam persekitaran harga yang stabil dan inflasi yang rendah, tambanya.

Dr Mahathir berkata bahawa dalam tempoh 10 tahun akan datang, sektor pembuatan akan berkembang pada kadar purata 8.3 peratus setahun dengan sumbangannya kepada KDNK meningkat kepada 36.0 peratus menjelang tahun 2010.

Industri berasaskan sumber seperti petrokimia, farmaseutikal, oleokimia, keluaran berasaskan kayu serta keluaran makanan dan pertanian akan diberi galakan sejajar dengan industri lain seperti automotif, aeroangkasa dan keluaran logam direka.

Sepanjang tempoh RRJP3, sektor perkhidmatan akan dimajukan sebagai pemangkin pertumbuhan dan sumber berpotensi untuk eksport bagi memperkukuhkan kedudukan imbalan pembayaran. Sektor perkhidmatan yang lebih cekap akan dimajukan bagi menggalakkan perindustrian yang lebih cekap dan berdaya saing.

Tumpuan industri pelancongan bukan sahaja untuk menambah bilangan

kedatangan pelancong tetapi juga menggalakkan mereka untuk tinggal lebih lama, berbelanja lebih banyak dan melancong semula ke Malaysia.

"Khidmat pelabuhan akan diperluaskan untuk menjadikan Malaysia negara maritim. Di masa yang sama, usaha akan dibuat untuk memajukan KLIA sebagai hub penerbangan Asia Tenggara," kata Dr Mahathir.

Perdana Menteri berkata langkah akan diambil untuk menggiatkan semula sektor pertanian bagi meningkatkan sumbangannya kepada pertumbuhan serta pewujudan kekayaan.

Katanya, penekanan akan diberi kepada pengeluaran makanan melalui penglibatan sektor swasta secara lebih besar dalam perladangan moden dan berskala besar terutamanya dalam kawasan pengeluaran makanan kekal.

Selain itu, sumber baru pertumbuhan juga akan dibangunkan terutama dalam keluaran barangan berasaskan herba yang bernilai tinggi, ikan hiasan dan bunga-bunga, industri bioteknologi serta pelancongan "agro" dan pelancongan "eco", katanya.

Bagi getah, usaha akan dijalankan untuk meningkatkan daya maju melalui peningkatan hasil, galakan penanaman klon getah balak, penggunaan teknologi baru serta mengintegrasikan tanaman getah dengan aktiviti ekonomi lain.

Dr Mahathir berkata usaha-usaha bagi menggalakkan pelaburan di luar negara untuk tanaman makanan dan ladang akan diteruskan bagi menjamin bekalan bahan mentah kepada industri dan makanan di samping mengambil peluang daripada kos pengeluaran yang lebih murah dan kewujudan sumber di luar negara.

Kadar inflasi akan dibendung pada tahap yang rendah dan usaha juga akan dijalankan bagi memastikan kenaikan upah yang selaras dengan peningkatan produktiviti.

Langkah untuk menggalakkan teknik automasi dan penjimatan buruh serta menggalakkan penyertaan lebih ramai wanita dan pesara dalam pasaran buruh akan mengurangkan tekanan permintaan.

Di masa yang sama kerja bercucuk tanam juga akan disusun supaya lebih teratur seperti dalam industri perkilangan, kata Dr Mahathir.

Perdana Menteri berkata dengan pemulihan ekonomi, sektor awam dijangka kembali berperanan sebagai penggerak kepada sektor swasta yang akan menjadi jentera pertumbuhan.

Kadar pertumbuhan perbelanjaan mengurus Kerajaan Persekutuan akan menjadi lebih rendah hasil daripada pengurusan fiskal yang berhemat dan penggunaan sumber secara cekap.

Keutamaan juga akan diberi kepada pembangunan sumber manusia. Seajar dengan usaha mengujudkan sektor awam yang bertaraf dunia, kerajaan akan terus mengambil pekerja yang cekap dan berkelayakan tinggi untuk meningkatkan mutu perkhidmatan awam. -- BERNAMA

MR MFJ OS